


97799

地420.11

641

部19:1



寬
城
隨
筆

序

禮稱入境問禁入國問俗雅稱周爰諮度周爰諮諏所以資印証而廣觀記也予於癸丑孟秋旅食寬城供職吉長路局寬城即長春縮穀吉黑奉三省鐵軌四達冠蓋絡繹退食之暇恒與賢豪士大夫遊述其山川風景考其俗尙土宜證之以志乘繼之以遊歷懷握鉛塹隨時筆錄再閱暑寒哀然成帙爰付版印以遺同志顏曰寬城隨筆聊備軒輶採風之一助云爾

民國紀元歲次丁巳暮春之月吳樵自識於吉長寓廬

寬城隨筆

長春縣亦曰寬城子（土稱）其命名始於遼按遼史置密州昌德軍屬上京路金大定間廢承安二年移州於長春縣而以故地爲金安縣則知長春縣之建設實始於遼元代爲郭爾羅斯部烏巴什占踞分前後二旗清天命九年歸服於清至嘉慶五年因墾民日衆遂置長春理事通判設廳治於新立屯（兩距今縣治五十里）道光五年移於現在治所之寬城子光緒八年改稱撫民通判十五年升府民國二年又改爲縣其沿革如此

長春地形平衍土地膏腴東通省會北控德惠農安南扼雙陽伊通西接奉屬懷慶伊通河流橫貫其中就地勢論並非險要之區特自東清鐵路告成縮歐亞交通之樞紐平夷洞達商旅輻輳街市遂日以繁盛甲辰日俄戰後俄將東清路南段割讓於日更爲東清南滿兩路起訖之地點吉長鐵路告成又控制省會之交通故論東省交通要道當以長春爲首屈一指焉

寬城隨筆

錫成公司代印

長春物產以農產物爲大宗黍豆粟麥所在多有尤以豆麥高粱爲最盛一年一收下種須俟冰融後約在陰歷四月初旬收穫在陰歷九月間因地力饒沃收成極豐農民一度犁田不復再施耘耨亦並不加以壅培而芟芟蕃茂更勝內地沃壤據農學家攷驗謂吉省地力極肥栽種植物十年不加肥料不至枯瘠誠一片大好農業場也乃強隣虎視眈眈日謀侵奪我不能設法抵禦爲興墾蕃殖之圖大好河山供人蠶食不亦悲哉

東省金融之紛雜無有過於長春者通用錢幣有大小銀圓官帖銅圓羌帖（俄幣）老頭票（日幣）正金鈔票等種種商界通用主幣爲官帖而小洋次之官帖有一吊二吊三吊五吊十吊五十吊一百吊數種係吉林永衡官銀號發行我國錢法本來極壞各銀號錢店類得發行錢票官中並不取締偶有倒閉商民大受其損此在京津各地屢見不鮮長春往昔亦蹈此弊迨前清光緒季年吉省永衡官銀號成立所發官帖大受社會歡迎當時北洋一圓祇可兌三吊有餘東省現



銀缺乏市面流行之錢幣幾全屬此項官帖奈當事者不知準備現金維持信用仍濫發無度遂至充溢市面價值一落千丈無從挽救甲寅夏秋之交大洋每圓可兌官帖十八吊小洋每圓兌十六吊有奇當軸者爲整頓錢法維持市面起見稟准政府收回官帖定率每小洋一元換官帖七吊作爲定額商民不得擅自增減違者治罪乃作法自斃令出不行官吏及銀號執事乘機漁利纍纍然填其貪囊而公家及商民未受絲毫利益反蒙絕大損害何則蓋官廳既定官價當令銀號如數兌發乃商民持帖往兌現銀者始則限制兌換之人繼則限制兌換之數人數擁擠則加以挾衆滋事之罪名兌帖較多又加以違犯禁令之訓斥甚且刑罰隨之而長官予取予求行員自由兌換莫可究詰故攫獲多金者不遇少數私人而商民交困金融呆滯錢法益加敗壞未幾小洋一元又可兌至十四五吊矣嗚呼此項官帖苟不全數設法收回銷燬淨絕前途之害正未可勝言也商人之買空賣空者當地稱之曰搗把業此者頗多日人蓋商民爲此每遇官中

禁令即無法可施黠者往往竄匿頭道溝（日僑居留地）託庇外人字下以遂其營利之私圖久之日人習知此中真相亦遂紛起角逐於是頭道溝遂成爲搗把之發源地每入北門內一帶銀錢舖常見木屐侏儒來問銀市者連翩皆是各銀號錢舖視銀價之漲落任意抑揚旅客初至長春兌換貨幣無有不受其欺者此種行爲無殊盜賊而商民方視爲惟一之牟利生涯街衢間鱗次櫛比悉屬此類小錢舖比諸他項營業尤爲發達

縣屬學校有師範中學高小兩等女子師範等校悉在城內馬號門一帶係歸長春道管轄設備多不完善教師亦多不得其人故形式精神一無可取學生寥若晨星多不足額其來者並非以求學爲目的蓋因學校不收學費貧寒子弟來受公家養育耳年齒少長自能謀生卽掉頭退學而去故成效絕鮮至於私塾改良者尤少攷其原因蓋長地人民土著少而客籍多商賈人等大半來自燕齊多不携家室土著農民散處各村自成風氣不知教育爲何物富紳官吏又往往自延

教師故教育更不易發達綜觀東省各屬大抵類此當軸者苟不知設法提倡惟事顛預敷衍恐教育前途永無振興之一日余意整頓之責究在長官一宜多派有學識經驗之視學觀察各屬學校報告優劣由長官分別懲獎二宜不吝修膳多延良好校長教師三東省各縣市街大抵交通不便一遇雨雪淫潦載途行人裹足宜修整道路以便學生往返四畢業學生該上級機關及該校長等應多方爲之謀事以上四項倘能切實履行學務當大有起色至推舉富紳巨商爲學董多開運動游藝等會以聯絡各界且引起常人慕學心茲數事於籌款有極大影響是又當事者及管理人所當注意者也

實業一項無足稱述惟商埠有一電燈廠係官營機關開辦之目的原爲抵制南滿鐵路附屬電燈廠而設此廠辦理尙稱得宜惟資金少而設備尙未完全營業所入僅敷所出又頭道溝有裕昌源麵粉公司營業尙稱發達此外則城中有小織布廠及毛巾廠一二處

當地名勝之區甚少郊外東南一隅峯巒起伏有小山數疊而石碑嶺稍著名嶺有石碑一座其建設年代不可攷相傳日人於甲辰戰役後在該地掘得金駒一具昇回本國意是遼金遺物郊外西南則有奎星樓朝陽寺崇樓傑閣掩映叢林尙足稱爲名勝惜地居偏僻修禊無人頭道溝日界公園係南滿會社所營建爲游人棲息之所雖夏秋之交紅花競艷碧樹垂陰頗堪托足然建設之年代甚邇絕無古趣可言商埠道署前公園爲前孟秉初省長憲彞創辦而郭侗伯道尹宗熙完成之乙卯夏間始行開放該地原係回教墳塋有古榆數十株蒼然鬱然天矯凌雲爲避暑絕妙之勝地其間疊石爲山疏泉爲池亭臺館榭點綴粗具夏日偶偕友人散步納涼即景賦詩一章以誌該園之勝概詩如下一抹斜陽淺淡中閑隨吟屐過園東森森老木侵衣碧點點飛花拂袖紅近水牛泓環小榭遠山數疊障遙空幽亭雅集宜觴咏踏月歸來興自融

長春妓院中人非遷自津奉即來從邗江可爲南北二派南派妝束時樣舉止輕

盈北派玉立亭亭天然秀曼余癸丑來長尙及見南北班對峙于商埠平康里一帶當時南班有飛雲閣龍雲閣兩處北班有素蘭蓮聲等數家日界頭道溝其始本無妓館日人鑒於域內商業不振亦擴充女閩爲招徠遊客計自東西群仙四玉等班次第開設平康里一帶妓寮遂大受影響門前冷落車馬稀甚至相率休業而頭道溝妓院生涯反比商埠發達推原其故日界妓院茶資較廉客有阿芙蓉癖者儘可一榻橫陳吞雲吐霧烟價又比內地特廉故黑籍中人趨之若鶩且此種妓院專收受掠賣女郎津滬拐匪實爲若輩鷹犬姿首佳者入院時千金立致少次亦可得五六百番小家碧玉墜落女娃一入青樓永淪苦海卽有親屬相知指名向官廳控告而地居租界引渡維艱以此龜鳩更明目張膽肆行虐待噫燈紅酒綠之場紙醉金迷之地孰知有孤苦無告女郎背人偷灑一掬傷心淚耶長春據北緯一百二十五度東經四十五度暑天涼爽冬令酷寒予居長三載以甲寅十一二月間爲最冷是年中國各省皆嚴寒異常固不僅東省一隅爲然也

華氏寒暑表降至零度下十九度間之士著言自東清鐵道開辦以來從未有如此之嚴寒江南一冬下雪不過數次關內一冬下雪不過十餘次寬城則一冬奚止數十次并秋春兩季算之常有百餘次耳乙卯春正元宵節後大雪狂飈九站吉林間線道積雪四尺有餘擁塞車輪機車不能前進斷絕交通三十餘時之久此種情形應亦爲吾國各路所無迨二月間天時猝暖地氣上騰河冰融解兼爲水力鼓盪冰塊悉衝向堤岸路局與城鎮交通之伊通河橋柱爲浮冰衝動橋基低陷致車馬不能通行吉林江岸及九站一帶江冰猝然浮起人民房屋財產之損失不可勝計商民所有木材堆積江岸待運者悉數漂失十不存一九站臨近之一五一一一五二兩處鐵道橋梁數抱之洋灰橋柱悉爲浮冰衝折運輸停止半月有餘修理費約及二萬元損失亦殊不貲沿路電桿冲毀者更不可勝計余曾隨車至九站見沿江灘岸所積之浮冰大者盈丈小或數尺稜稜堆列皎若冰山各極異狀信奇觀也

吉長鐵路計長八十三英里合華里二百四十有奇當日俄戰後日人倡議建設吉林長春鐵道爲擴張國力計當地人士咸思抵制以保存主權因有籌辦之計畫當時係屬商辦主其事者爲前清吉林候補道宋春鰲此光緒三十二年間事也嗣因當事人不諳路務辦理失宜經郵傳部收歸國有其時適中國政府向日本收買新民府至奉天之鐵路屬之京奉日本要求他項利益吾國政府遂允與日合辦吉長鐵路光緒三十三年與日訂立合同開辦費定五百萬元中日各半日本方面資金由南滿鐵道公司餘利項下撥發計日幣二百十五萬元中國資金除商款抵作股分外其政府所出資金大半取京奉路餘利撥給故路局辦事員日人多來自南滿鐵道華人多來自京奉鐵路自光緒三十四年迄宣統三年其間均爲工程時代至民國元年十月全路始行通車惟路綫綦短沿途無繁盛城鎮營業頗不易發達所運之貨全恃農產品如糧食大豆木材煙葉均爲出口貨之大宗除木材外其餘均在隆冬輸運故冬令之運務尤忙通車後第一二年

冬運輸狀況最佳之月收入不過五六萬元或七八萬元第三四年運輸最繁之月收入可得十萬元或十萬元以外矣

全綫車站爲頭道溝長春卡倫飲馬河下九台營城子土們嶺趙家店樺皮廠孤店子九站吉林計共十二處頭道溝站爲長春段之起點與南滿鐵道接軌地居衝要交涉紛繁長春係總局辦事機關所在地極重要惟四面荒野距城遼遠交通不便盜賊橫行當初主路務者不知何故樂居此僻壤貽後人以無窮之危害卡倫爲長春縣屬之一小村落地產黍豆米麥飲馬河係驛馬河之訛音該河流會伊通河而東注松花江水利饒沃故所產五穀及大豆頗爲豐富抑且價廉下九台於鐵路未建設以前地本荒落通車以後商旅漸集且地當吉林德惠長春三縣之孔道交通便利鹽局稅局次第設立近已成爲繁盛市集本地產品亦爲糧豆等類營城子爲吉長線適中之點該處有水塔一所東行機車多在此上水車站與市鎮相距二里而遙物產亦無非黍麥豆粟等類臨近有煤礦二處一爲

裕吉公司煤礦所產盡屬烟煤經礦學家化驗煤質頗佳惟所含油分較少價值比諸南滿撫順煤特廉苟辦理得宜未常不可擴張利權與撫順煤爭雄於長吉及北滿一帶特資金不足開挖悉用人工或作或輟供不應求以是不能發達又有馬家溝煤礦爲東源公司營辦所產盡係無煙煤土門嶺亦吉長間適中地段亦有水塔一所西行機車俱在此上水山嶺崇高坡度居地平線上百分之三機車經由該嶺行駛維艱汽力不足掛軸逾量常至滑下溜退開張沓門生足火力鍋爐又極易受損故吉長路機車修養費謂其半由過嶺所消耗亦無不可嶺旁羣山羅列樹木叢生春則梨杏爭妍燦如雲錦夏則山容嬌潤蒼翠若滴秋則野花吐艷五色繽紛冬則楓葉呈丹疎林蕭瑟設爲遠足旅行此地殊堪尋勝趙家店在土門嶺東居山坡之上規模狹隘運貨極少此站之設不過爲列車過嶺時之呼應於營業上無甚利益也樺皮廠隸屬首縣堪稱重鎮臨近各屯常間日集市於此販買豆糧類日以數百石計每冬由吉長運向南滿出口者不下二萬噸

孤店子係民國三年冬新闢之站地面荒涼臨近有村集數處略有豆糧類輸運然比諸其他大站則不逮遠已九站距松花江僅半里許車中一望可見江東森林遍處皆是所砍伐之木材悉浮江而下匯集於九站江灣故該站之運輸品以木材爲大宗然附近各屯所產糧米大豆運長者亦頗繁盛該處糧食之貿易均會集於烏拉街爲金元以來著名商場站西南有老爺廟者其他有一行宮係清高宗駐蹕之所鐵路未通以前仕宦之經行者多止宿焉吉林站爲東段之終點地距松花江約二里餘爲圖運輸木材便捷之故軌道直達江岸臨江一望水色山光侵人眉宇萬家廬舍鱗次櫛比片帆如駛瞬息百里南人睹此不禁興故鄉之思由站入城必經商埠此埠爲陳劍池中丞於前清宣統年間奏請創辦擬開關馬路建築屋宇招徠商賈爲振興市面計詎知經費不繼有始無終馬路雖開而廬舍尙付缺如至今沿街兩旁磚瓦纍列成堆風吹雨淋恐再閱數稔將悉成土礫矣由吉運長之物產木材煙葉豆糧爲大宗其餘則藥品毛皮蘑菇芋麻類

運往大連營口及關內者亦頗不少

四圍山色中一鞭殘照裏余髻齡讀此兩詞每心焉嚮往謂苟得身踐其境胸襟何等開拓然自束髮讀書以迄年登弱冠擔簦負笈足跡所經不過大江南北蘇省一隅之地湖山雖好恨未能環拱於我四圍後留學日本大阪時曾赴西京一遊覺首句得以身歷矣次句則以乏騎乘故猶未實踐乃初次赴吉林由站驅車入城一路蹄聲得得日色沉沉四向環顧羣巒列繞不禁色然以喜謂廿餘年來素心所嚮往者不意於塞外數千里窮寒僻壤躬歷之溶我神思廣我見聞亦屬幸事相傳鷄塞九龍環拱王氣所鍾宜乎爲清代發祥之地也

吉林名勝首推北山及龍潭山北山在德勝門外距城密邇故春秋佳日游人孔多雖山形平衍無林巒泉石之勝而登高一覽羣峯環列江水襟帶百凡景物悉入眼底頗足令人心曠神怡山上前有武聖廟後有觀音龕每逢舊歷四月廿八日遠近市民前來進香者絡繹不絕因之馬龍車水土女如雲百戲雜陳商貨輳

幅彩色紙花臨風飄颻更爲此熱鬧場生色不少山下有演武廳一所爲清代興國時故蹟孟氏按吉時又將江南岸之公園建物悉數移來山下從此彼都人士每逢佳節登臨不患無觴咏宴息之所矣

龍潭山東距城約五里有奇在江東岸形勢比之北山更覺嵯峨以龍潭稱者緣山中本有池潭相傳清始祖創業之初孤身受敵人追逐倉皇遁匿潭旁忽有羣鴉飛集其上藉其障蔽遂得脫難興國以後因封此潭爲龍潭山亦因茲得名潭側建有牌坊地方官每於旱時在此致祭祈雨潭水澄碧終年不涸其泉脈直通松花江距潭百數十武又有所謂帝王樹者亦係山中故蹟幹似榆今已枯死不辨何種其栽植之年代不可攷據當地人云此樹與有清一代國運有關前清時每歲初夏長官均往致祭并圍以朱欄守護備至乃光緒季年樹忽萎謝有小樹旁生初亦欣欣向榮民國紀元小樹亦萎彼都人士嘖嘖稱奇以爲清祚興衰果與此樹相爲終始也山頂廟宇二處祀觀音及元壇另有軒屋三間爲遊人歇足

地香火夫守之此外未見民居廬舍境域荒涼孤身入山往往有遇劫者四五月間廟中香火繁盛遊人尤多予於此山之勝不取其他而特取其林木之鬱茂乙卯初秋偕同僚數輩入山遊覽但見叢林夾道碧蔭婆娑微風襲人涼生衣袂樹木深密處并不見天日炎夏在此道署允稱佳地即景一絕附錄於下一代興亡付逝波名山終古靄煙螺寒潭澄翠迷芳艸枯木交柯贖蔓蘿日影偷從林際人泉聲飛傍耳邊過松江野渡歸程緊漫聽漁翁倚棹歌

臨江眺望見有一葉小舸搖漾波際底平舷傾兩端銳削係用巨木剝成土俗稱之曰臙艘亦曰威弧威呼蓋一語之轉音也契丹國志載混同江之地其俗剝木爲舟形如梭曰梭船意卽指此雖人工拙劣而形式殊輕便臨流蕩槳行駛如飛然欲載重非方舟覆板不克濟此類船祇堪充漁渡之用冰期間常用以代馬槽又有所謂扒犁者卽冰橋是也似車無輪似榻無足狀類型故土人呼之曰扒犁滿語曰法喇係取整木削成兩轅前半翹起後半貼地上支四柱柱鑲四框一似

箱架倒覆於地加以曲轅而致用底框之上支以板載輕便之物則繫繩於轅端一人可以牽引而行載重或載人時則駕以牛馬駛行冰雪中非常迅速駕犬者謂之狗扒犁魚皮韃子慣使用之卽昔之所謂使犬部也

魚皮韃子卽黑斤人之別稱自伯力〔俄領土〕東北行一千二百餘里至阿吉大山其間沿松花江兩岸居者皆呼爲黑斤亦曰矩毛子約共五六千人男女皆薙髮女未嫁者頂挽椎髻已嫁則垂雙辮鼻貫金環用布一幅曰勒勒自頸斜拖至膝寬以揜覆兩乳爲度腰以上剪色布或魚皮爲花貼之腰以下取銅片圓徑一二寸者二三十枚〔鑿空如雲紋呼曰空盆〕繫之行時丁冬有聲其言語類滿人衣服亦悉如滿製喜紫色袖束花帶寬二三寸足穿靴以獸皮或魚皮爲之自膝至踝每剪色布或魚皮爲花飾之男子耳亦垂環惟與女環少異其俗無文字削木裂革以記事不知歲閏弦朔問其年歲但以食答抹哈魚〔見後〕幾次對夏捕魚爲糧冬捕貂易貨漁用網用釣捕貂用藏弩貂行繩動弩發立中之射其他

獸類皆然百無一失並善偵獸踪迹之必得冬令以數犬駕舟犬皆肥碩而馴舟形如擡長丈餘寬尺餘高如之雪後加板於下鋪以獸皮以釘固之令可乘人持篙刺地行駛如飛游棲之所取樹皮或草結爲小屋有安口〔樺皮爲之〕槎羅〔草葺圓棚〕胡莫納〔樺皮小圓棚夏令所居〕麻依嘎〔不薙髮黑斤人所居以上皆捕魚之舍〕傲筍〔冬行晚宿之所以樹皮或布爲之〕阿吉嚶莽〔行船晚宿岸邊布棚〕刀倫〔同上〕等名目家居則皆草房有暖坑門沿大江門前置晾魚木架得魚則劈爲四片曝之架骨投狗食不識金銀富者蓄蟒緞錦皮以自封殖族中酋長每喜將先代所遺甲冑長官所給誥命炫異過客以示榮耀子弟遠行歸左執壺右舉杯先勸尊長飲依親屬之遠近次第進酒一巡然後自飲尊長旋吻其兩頰以示親愛居恒親故往來以抱見爲禮見長官則跪拜性好吸菸終日吞烟吐霧卽幼童少女亦無不酷嗜有疾不用醫藥惟跳神祈禳刻木作圭形置坑頭以祀祖先歲久則送入林中更刻木肖鷄鴨貓狗形或人騎馬形置木匣

中藏於室內稱之曰額奇赫亦曰搜溫冬令人山捕貂置於林間宰牲置酒祀之以求福庇又範銀或鉛錫類小人十餘個懸諸胸次遇有禱祝輒祭奠之又刻木爲熊虎形置諸林中遇吉凶事亦必抱置坑頭陳饌品祀之跪禱旣畢仍送置原處子女誕生無論冬夏概沐以凉水最忌痘症一屯偶染合屯皆遷避不遑否則徙病者於林中爲胡莫納以居之〔見前〕愈而後歸一鄉一族各有長爭訟往訴輒爲招集証人評論其是非曲直爲之判斷輸者令納物自贖名曰納威勒讞定後訟者及證人皆無異辭然後鄉族長以杖叩地者三令毋翻議始各退歸否則再集人證另議亦有一訟牽纏數月者其法殺人者死餘視罪情之輕重議罰自混同江下游達海岸其間土著之黑斤人有薙髮與不薙髮之別薙髮者居住於伯力迄阿吉大山沿江一帶其習慣性情風俗旣如上所述此種人在前清定例每歲其酋長必須至三姓副都統署獻納貂皮自割隸俄國後俄人施以政教改其服裝已浸與俄人同化幾并其祖先而忘之矣不薙髮之黑斤種人自阿吉

大山沿混同江東北行至黑勒爾地方兩岸居者共約二三千人風俗與雍髮黑斤同惟語言各異通稱曰長毛子男垂辮染濟勒彌人風氣多喜弄熊向亦貢貂於三姓又自黑勒爾以下直至混同江入海口共約六百餘里舊爲費雅喀人所居今則合鄂倫春奇勒爾二族統稱爲濟勒彌人女未嫁者椎髻垂背嫁則合梳雙辮橫束腦後言語與不雍髮之黑斤人亦不同而鄂倫春奇勒爾二族又各自操本部語言與純粹土著之費雅喀人有別亦無醫藥文字不知歲時弦朔至於錢貨廬舍則江東諸族固一致也夏乘賊艦至口外各島及江沱海汊漁釣冬則駕扒犁至索倫河南與諸種人爲貨物交換家畜多犬旣老宰之食其肉而衣其皮寒暑一裘終年不易

黑龍江之東外興安嶺之南恒滾河之西北其間土著之民爲奇雅喀喇及鄂崙春兩種人善馭四不像逐獸逾嶺捷如猿猴四不像蹄似牛首似馬身如驢角如鹿蓋家畜與野獸交合所產特種之動物其性馴良而善走不芻不豢惟食石苔

(寒帶地方植物所在多有)騎乘時繫之前來用畢則放牧於山野惟此兩種人之循良者多半爲俄人收入馬隊頑梗者被俄遣戍於小亞細亞毗連之回部混同江海口一帶濟勒彌人親死則削木爲像略具口眼衣以熊皮食時必取少許納像口妻喪其夫亦然像側常繫一犬胸次懸刻木小人二有事輒行祈禱或刻熊蛇山魘形懸之有大祈禱則延薩瑪教徒爲跳神之舉薩瑪教者爲東夷之一種宗教在昔滿洲人亦迷信之凡人患病輒延男巫或女巫至家左手執鼓以鐵絲貫錢數十枚橫繫鼓之兩耳脅肩蹈足而行援桴鼓之使錢不相併而取其錚鏗有聲腰裙曳地裙帶繫銅鈴鐵鐺等物行時亦丁東作響先喃喃作咒旋作狐鼠鬼魅言能行幻術以利刃刺病人患處截時似已分裂兩段刃抽出仍復其舊故俗人信之甚卽今吉省臨江等處亦有此陋俗至於松黑烏三江下游南及朝鮮咸鏡諸道亦均染此教迷信異常至黑斤地方則先以數人作薩瑪狀繞室週行一巫由坑躍下兩足左右跳蕩作諸詭態吞火飲酒任意索取各種穢物入

口以刃自擬其腹令壯夫數人推之皆觸退仰跌取皮帶長數丈者置壁隙使壯夫數輩堅持其一端而牆外一端自能蜿蜒外引視之固虛無一人也其恢詭迷妄多類此凡此濟勒彌人垢穢尤甚門前皆置晾魚木架夏日過之腥臭刺鼻清初常與苦夷〔即庫頁島人種〕至阿古大山上游莫爾紇對岸桑烏林木城中歲受服物之賞由三姓副都統署派旗員接待之該族名曰穿官亦歲時貢獻貂皮等於清廷云

俄領伯力以東因拔納斯科迤南同爲奇雅喀喇地方又有一種人華人稱之曰二腰子者其言語與黑斤濟勒彌人又異蓋東夷之別種也人數約四五千削木記事男女俱蓄髮由耳後垂兩瓣及肩下用紅絲束成椎髻垂及乳際其下又以彩繡貫五色珠陸離繽紛以爲美觀頸後復用綵線橫繫雙瓣有喪則解去之人死掩棺於土婚姻由家長主之其禮俗頗有華風性更好潔婦女月必有數日背人獨居其夫亦不與相近勤澣沐嗜菸酒多王姓牛姓自言係宋將牛皋王貴之人

後避亂居此蕃衍成族云

二腰子之一族迷信薩瑪教一如黑斤而巫術更神能爲吞刀吐火之術吐蛇蛙於地旋嚙嚼無餘諸如此類詭狀甚多此種人善鎗擊騎射能與猛獸角鬥獨殲熊虎濟勒彌黑斤等種人俱畏其勇冬令出行乘類似扒犁之踏板擡車逐獸如飛喜與華人交接互市性亦相近蓋烏蘇里江右各夷此爲半開化之民族矣是土割畀於俄數十年獨此種人無與同化者俄人亦畏憚之不令編伍易服也黑斤費雅喀濟勒彌人在今日吉林省東北邊自依蘭以東如樺富臨綏等屬皆有其蹤跡但血統多已混合沿河漁捕者輒稱爲魚皮韃子其倚山林居處之獵戶則稱之爲打牲人或稱爲打牲索命第視職業以區別之而已

吉林自改爲行省後務旗處曾籌畫安插黑斤人之方法計口授田十年內蠲其租稅俾自行耕種爲生聚長養之圖據旗務處調查在富錦縣之黑斤人當清初原有四百餘戶三百年來仍不加多以所生子女多半死於痘疫故也他處之黑

斤人數可以此類推據五年前之調查樺富臨綏四屬黑斤人總數共七千餘人云

吉省土著除八旗外以山東人爲最多百年來清廷禁令漸弛傭工或挖參者先後紛集日增月盛凡執勞動業者幾無處無山東人來時肩負行囊手持一杖過嶺藉以扶持遇敵用資捍衛俗稱之曰山東棒子尤奇者魚皮韃子以不通言語不諳交易之故每家必用一山東棒子爲主家務稱爲管家人家產皆令掌之吉省東部山深林密燕齊流民於農礦兩業之外兼營采葎棒樵營定確木營菜營種種事業此輩俗呼跑腿子亦曰穿山溝曩年踪跡遠者直達東海之濱近俄人嚴禁採獵地點已不能踰國境一步生計因之日艱采葎棒樵營情況具見後文定確者設木爲確以捕獸亦曰定確房木營者冬令入山伐木春水驟至時隨溯水下山編筏於江口乘之以出售菜營者係在柞木叢中伐樹倒地經年徧生木耳撥拾而售之至於採掇山中之藥草則屬若輩之副產品凡轉徙山林者隨

處因樹爲屋夜或野處熬火自衛其膏虎狼口吻墜巖谷喪命者往往而有在各山溝口則已有築房舍兼務農業者每溝咸推一頭目爲主稱之曰溝大爺數溝又公推一人曰總爺有事則召集各溝頭目會議公決徵集時用木牌傳遞其上並不刻字各溝見牌立至

吉省物產繁夥寶藏豐富山水清幽地力雄厚既如上所述矣當地人於土產中尤視爲寶貴者爲人葎貂鼠烏拉草三種諺云吉林有三寶人葎貂皮烏拉草茲就三種產品略述其大概如左

葎性熱而補氣老年人服之尤宜最貴重者曰老山葎係採自山野年代愈久者形質愈大凡重逾二兩者非數百金莫致卽分兩少輕者其價亦特昂年老體羸服之精神陡健垂死之人服之亦可略延生命相傳蓋棺後數十年敢視膚革充盈一如生人但未知信否老山葎外爲移山葎及種葎功效亦具特遠不如老山矣葎一苗高數寸苗頭平分數莖每莖五葉形如掌六莖爲最多其根株亦最佳

間有一二莖挖出至美之根者是必原根（俗名蘆頭）以受傷多年側生一苗者也土俗名採蔴爲放山又曰挖棒椎緣前清時禁採道咸間禁例綦嚴往採者須由官中票房領取專票名挑官蔴至今猶有某票房之說嗣後弛禁改征蔴稅始任人採挖放山者分三期四五月爲放芽草因百草甫生蔴芽萌茁即從事尋覓也六七月爲放黑草其時叢草一碧最難認辨八九月爲放紅頭因蔴苗頂心已結淺紅色子較易認識及蔴子落後曰放刷帚頭畢事下山曰轆棍當進山時有把頭者率領數人至山上翹首瞻矚惟見林木遍山四望一碧晨視某山樹頭獨蒼潤出羣者相偕前去至則又驗其草木枝葉堅茂者即呼曰有蓋此山非具有此種土性不克產蔴其占候察驗純恃心得也因在其地砍伐樹皮構造小舍稱曰窩棚把頭令其夥排列成行人各相距丈許執棍曰索羅木棍者撥撥身左右草叢逐步審視瞥見蔴苗即大聲高呼衆人嚮至詳細搜尋再查有他苗與否挖蔴時量蔴草之大小四週輒刈草成圍然後向下挖掘一面起土一面用骨簪撥

辨草莖恐妨蔴之根鬚也挖出之蔴雜以青苔裹以松皮俗曰棒椎甬子背負下山以製售亦有下山後移植蔴營者名曰移山蔴堅壯者亦爲佳品

蔴營俗名棒椎營種蔴區也種蔴在清道咸以前亦干禁例徵稅後可公然從事矣種植時先於森林中擇一土性相宜處挖一畦長約三丈寬五尺土質攪使鬆細預將蔴籽窖地一年名曰發籽次年將籽播撒畦中覆以土灰出苗後三四年至秋九十月間又移植他畦鋤畦成隴排例插蔴更取高約七尺半之板棚蔽之亦間有用布者每年春秋二季揭板向陽三五次並當連綿細雨時俾沾澤一二次一切皆有程期過度則倒爛又三四年白露節後方起蔴製造名爲做貨做時先將鮮蔴用沸水煮之半熟再以小毛刷刷去其浮皮並用白線扣成小弓弦將蔴紋中塵土剔淨而後用冰糖熬成清汁將蔴浸灌一二日上鍋蒸熟再上火盤拷乾乃以出售亦有不煮水不灌糖而生刷生蒸者名曰麗蔴即假高麗參之粗製者是也種蔴之中洋蔴高麗蔴之辨別甚微大抵視根有多節叢莖之上有細

粒如珠及質堅紋細者以爲取舍而已每年輸運出口爲吉林天產之大宗據營口一處稅關報告重量歲約三十萬斤價額在三十四五萬圓左右至由京奉路運往京津一帶者尙不在內

貂皮爲吉省特產毛根色青者曰青鞞三姓以東毛根略帶紫色者曰紫鞞高麗奉天等處所產毛根灰白者爲草鞞其中以紫鞞爲最上品緣氣候愈寒則毛色愈純厚故三姓以東之皮張最良捕貂者用釘確法於森林中築一確房四方釘確四股每股長周三十里釘確約三百盤四股之確共千餘盤二人守確房各日一巡視其確式就倒木或伐巨木爲之左右釘五寸高之木椿兩排每排八株中以兩株爲門椿下置活木滾棒確槽闊五寸許後釘一小椿曰老椿取材木縱橫構成機械架於其上貂鼠經過滾棒下沉消息木脫出則木槓下落因而壓斃矣寒露節爲支確期謂之推橋頁霜降後捕貂最多之時謂之打響草以貂好捕灰鼠其時落葉滿地貂踏草有聲恐灰鼠驚遁即躍上倒木而行也貂在森林追捕

灰鼠往往游行各山無定居嚮草時亦爲過貂期因林中松子已結實灰鼠奔走覓食松子貂則隨之視松子之有無以占豐歉捕貂而兼捕灰鼠焉至大雪節則將老確盡行收拾因雪地無聲貂不登確且冰凍確亦凝滯不靈故也大雪節後乃另組攆貂法其時森林中幾於每夜降雪貂晝眠夜出挨搜樹竅以捕灰鼠天明卽伏樹竅內捕者於清晨負二兜均插板斧外帶火具硫磺風扇等物於雪中踏驗夜間貂踪必驗明有人跡而無出跡者先以樹枝杜塞竅口防其出竄再用爛木屑爲火具取硫磺線燃之俾生濃煙更用風扇揚煙入竅燻之俟燻透取土和雪塗掩竅口貂遂悶斃竅中因砍木而取出之第近來業此者多用網兜并畜養獵犬嗅取定巢較前益加便捷矣

烏拉草一名六髮靴革草色深碧其細如髮長者四尺餘吉省各地皆產谿谷岩石中蒙茸下垂者皆是也入冬不枯性溫暖能禦寒避濕東人常取鋪臥榻農工人等均用以薦履履用方尺牛皮曲成之不加緣綴覆及足背冬夏胥着以操作

因用此草薦履故即以烏拉名履俗書作鞞鞞不知者以爲即牛皮鞋也
吉林東南長白山系之谿谷中所產哈蟆滿語曰哈什蟆其形與他處所產者迥
異徧體光亮尻無竅穴并不辨其雌雄土人云雄者值山中新雨後腹生涎沫雌
雄常黏合雖力劈之不解即其交尾時也特不知其孵卵情形飲而不食無排洩
器故寒霜既降輒膨脹以死剖之腹中滿貯黑粒如鷄冠花籽黑粒中包裹之脂
肪小塊肥潔瑩白烹而食之〔烹食之法一如銀耳先浸後烹〕味極腴美其性滋
陰可當補劑今販售南中各省多用爲食品有謂此物飲葷水而生故哈什蟆所
在地點必產葷云

東珠亦爲吉省天產江河巨流中蚌蛤多懷之尤以牡丹江上游爲最盛甯安府
城南并有珍珠河之稱色紺碧少渾圓中間常現凹紋然佳者則光彩晶瑩遠勝
南省所產蛤插立沙內如排牆然採者挨次拾取以熱水略炙其壳去肉取珠肉
不可食但得珠耳然珠或有或無未必每蛤中皆有也且小珠居多大而光圓者

什中難得一二前清時烏拉總管旂署設有珠櫃採取者有專役名曰珠軒十人
或八人爲一排腰繫繩索每當仲秋入河搗摸以備貢品此外無專採者間有屯
農於春夏間採之而得珠與否旣不可必且所遺蛤肉必須隨時埋燬若爲珠櫃
旗人所見則指爲私採恫嚇訛索不堪其擾故多視爲畏途現在省城市肆所售
之珠多來自松花江上游一帶

混同江下游東北海口有大魚長一二丈大數圍首有孔孔中噴水高一二丈旬
然有聲聞數里之外黑斤濟勒彌人通呼爲麻特哈謂此魚奉海神命送魚入江
以裕民食者此間土人皆不知歲月特以江蛾爲捕魚徵候每於江面花蛾變白
時〔五月〕麻特哈送烏互路魚入江及青蛾初起〔六月至七月望前〕送西里性
魚入江至江面小青蛾再飛起時〔八月〕送答抹哈魚入江皆至特林河口而返
其馭魚進口也每三四爲羣各去里許逆流而上掀波撥浪勢甚洶湧烏互路等
魚則率羣前行若不敢少止者日行可三四百里俄人於廟爾地方初見烏互路